

ORDENANZA FISCAL NÚM. 116**TAXAS POLA PRESTACIÓN DE SERVIZOS NAS ESCOLAS INFANTÍS (0-3 ANOS)
MUNICIPAIS****ARTIGO 1º. NATUREZA, OBXECTO E FUNDAMENTO.**

1. En uso das facultades concedidas nos artigos 133.2 e 142 da Constitución e polo artigo 106 da Lei 7/1985, do 2 de abril, reguladora das bases do réxime local, e de conformidade co disposto nos artigos 15 a 19 do Real decreto lexislativo 2/2004, do 5 de marzo, polo que se aproba a texto refundido da Lei reguladora das facendas locais, e artigo 81 da Lei 5/1997, do 22 de xullo, da Administración local de Galicia, este Concello establece as Taxas pola prestación de servizos nas Escolas Infantís (0-3 anos) municipais na presente ordenanza, as normas da cal atenden ó previsto nos artigos 20.4 e 57 do citado Real decreto lexislativo 2/2004, do 5 de marzo, polo que se aproba a texto refundido da Lei reguladora das facendas locais.

ARTIGO 2º. OBRIGADOS Ó PAGO

Están obrigados/as ao pagamento os/as usuarios/as ou beneficiarios/as dos respectivos servizos.

ARTIGO 3º. CONTÍA

1. Para a determinación do importe mensual que van pagar as persoas obrigadas ao pagamento das taxas teranse en conta a renda per cápita mensual da unidade familiar. A súa aplicación computarase segundo o seguinte:

- a) Entenderase por unidade familiar a formada polos cónxuxes non separados legalmente e:
1. As/os fillas/os menores, con excepción dos que, con consentimento das/os nais/pais, vivan independentes destas/es.
 2. As/os fillas/os maiores de idade incapacitados xudicialmente suxeitos á patria potestade prorrogada ou rehabilitada.
 3. As/os fillas/os maiores de dezoito anos discapacitados cun grao de discapacidade superior ao 33 por cento.

A determinación dos membros da unidade familiar realizarase atendendo á situación existente no momento da solicitude da praza, dacordo coas seguintes regras.

- b) Tomarase o importe dos ingresos totais da unidade familiar, que será o resultado da agregación das rendas do exercicio fiscal pechado ao finalizar o prazo de matrícula, de cada un dos membros da unidade familiar, calculadas por agregación da base imponible xeral coa base imponible do aforro, calculadas segundo os criterios establecidos na normativa do imposto sobre a renda das persoas físicas.

O importe dos ingresos totais da unidade familiar será acreditado, mediante a presentación das correspondentes certificacións tributarias emitidas pola Axencia Tributaria das declaracións do IRPF, ou a certificación de ingresos das persoas que non presentasen as declaracións do IRPF.

A documentación anterior poderá ser substituída pola correspondente autorización á Administración para obter os datos necesarios para determinar os ingresos totais para estes efectos a través das correspondentes administracións tributarias.

c) O importe anterior dividirase polo número de membros computables da unidade familiar. No caso de familias monomarentais ou monoparentais, incrementarase nun 0,8 o número real de membros que compoñen a unidade familiar. Entenderase por familia monoparental a unidade familiar a que se refire a letra a) cando formase parte dela un único proxenitor ou proxenitora que non conviva con outra persoa con que manteña unha relación análoga á conxugal e sempre que o outro proxenitor ou proxenitora non contribúa economicamente ao seu sustento.

d) A renda per cápita mensual será o resultado de dividir o importe anterior por doce.

2. A contía que corresponde aboar pola prestación dos servizos a que se refire esta ordenanza determinarase segundo a cantidade fixa ou en función dos elementos ou factores que se indican:

De 1 de xaneiro a 31 de agosto de 2023

Renda per capita mensual	Cota atención	Cota comedor
De 0,0 ao 30% do IPREM	Exento	Exento
Do 30 ao 50€ do IPREM	Exento	4,71€
Do 50 ao 75% do IPREM	34,91€	11,60€
Do 75 ao 100% do IPREM	69,81€	18,21€
Do 100 ao 125% do IPREM	112,13€	25,39€
Do 125 ao 150% do IPREM	133,29€	33,12€
Do 150 ao 200% do IPREM	147,05€	41,40€
Superior ao 200% do IPREM	169,26€	50,23€

A partires do 1 de setembro de 2023

Renda per capita mensual	Cota atención	Cota comedor
De 0,0 ao 30% do IPREM	Exento	Exento
Do 30 ao 50€ do IPREM	Exento	5€
Do 50 ao 75% do IPREM	34,91€	10€
Do 75 ao 100% do IPREM	69,81€	20€
Do 100 ao 125% do IPREM	112,13€	30€
Do 125 ao 150% do IPREM	133,29€	40€
Do 150 ao 200% do IPREM	147,05€	60€
Superior ao 200% do IPREM	169,26€	70€

ARTIGO 4º. OBRIGA DE PAGAMENTO.

A obriga de pagamento nace en xeral dende que se inicie a prestación do servizo.

ARTIGO 5º. DOMICILIACIÓN DE PAGAMENTO

Para os efectos de cobro, as familias que utilicen este servizo terán a obriga de presentar unha conta bancaria ao seu nome, onde se cargarán por adiantado os primeiros días de cada mes os recibos correspondentes a cada mensualidade.

ARTIGO 6º. INCIDENCIAS

1.- Excepto nos casos establecidos neste artigo, as escolas infantís aplicarán as mesmas cotas tódolos meses, sen ningún desconto por vacacións ou días non lectivos. Nos casos nos que existan incidencias que modifiquen a cota a pagar por parte das familias, o cálculo realizarase sempre sobre a base dun prorrateo de cota correspondente a 20 días, independentemente do número de días lectivos que teña o mes, aboando a familia a cota prorrateada desta forma e multiplicada polo número de días de asistencia no mes no que se produza a incidencia.

2.- A inasistencia da usuaria ou do usuario durante un período determinado mentres non se formalice a baixa correspondente non supón redución ningunha nin exención do pagamento da taxa establecida coas seguintes excepcións:

a) Cando por causa debidamente xustificada a nena ou o neno deixe de asistir temporalmente á escola aplicarase o sinalado no punto 1. De igual xeito, aplicarase o disposto neste punto 1, no caso de ausencia por enfermidade ou hospitalización da/o nena/o por un período igual o superior a 15 días continuados.

As solicitudes de suspensión do aboamento da cota, deberán ser presentadas no Rexistro Xeral do Concello ou ben utilizando os medios establecidos no artigo 16.4 da Lei 39/2015, do 1 de outubro, do Procedemento Administrativo Común das Administracións Públicas xustificando documentalmente os motivos da solicitude, que no caso da ausencia por enfermidade será o informe médico que sinala a necesidade de non acudir á escola ou, no seu caso, da hospitalización.

b) Nos supostos de incorporación unha vez iniciado o curso escolar, o aboamento da taxa será dende o mes en que se lle concede a praza.

c) Ao longo do curso poderase proceder á revisión do prezo fixado inicialmente cando concorran variacións nos ingresos, que supoñan unha diminución ou incremento de máis do 20 por cento no cómputo anual fronte aos declarados na solicitude ou reserva de praza, variacións que deberán ter unha duración dun mínimo de 3 meses para ser tidas en conta. Tal revisión de prezo poderá realizarse de oficio, ou mediante solicitude por escrito da familia afectada que deberase presentar no Rexistro Xeral do Concello ou ben utilizando os medios establecidos no artigo 16.4 da Lei 39/15, de 1 de outubro, do Procedemento Administrativo Común das Administracións Públicas, mediante escrito firmado polo suxeito pasivo, achegando a documentación acreditativa da situación.

d) Cando as familias dos nenos ou das nenas matriculadas/os nas escolas municipais soliciten baixa terán que presentalas no Rexistro Xeral do Concello ou ben utilizando os medios establecidos no artigo 16.4 da Lei 39/15, de 1 de outubro, do Procedemento Administrativo Común das Administracións Públicas, sempre antes do día 20 do mes anterior ao mes no que queiran deixar a escola. De non ser así, as usuarias e os usuarios deberán aboar a cota correspondente, sen posibilidade de devolución.

As baixas na escola computaranse por mes completo no caso de incumprimento do parágrafo anterior.

e) Todas as familias aboarán a contía de once mensualidades por cada curso escolar de setembro a agosto.

En caso de ausencia por enfermidade ou hospitalización da/o nena/o por un período igual ou superior a 15 días continuados, a suspensión da cota terá lugar desde o primeiro día do mes natural seguinte á data da inasistencia á escola, e durará ata o primeiro día do mes natural en que teña lugar a reincorporación da nena ou neno á escola. Non obstante, se a reincorporación se produce con posterioridade ao día 15 do mes, a cota correspondente ao dito mes reducirase ao 50 por cento.

Neste caso a solicitude deberá ser presentada no Rexistro Xeral do Concello ou ben utilizando os medios establecidos no artigo 16.4 da Lei 39/2015, do 1 de outubro, do Procedemento Administrativo Común das Administracións Públicas, acreditando tal circunstancia mediante informe médico no que se xustifique a necesidade do tempo de repouso ou de hospitalización”.

DISPOSICIÓN COMPLEMENTARIA

Para todo o non previsto expresamente nesta ordenanza fiscal será de aplicación directa a regulación contida nos artigos 20 a 27 do Real decreto legislativo 2/2004, do 5 de marzo, polo que se aproba a texto refundido da Lei reguladora das facendas locais, e as demais normas concordantes de réxime local, e subsidiarimante os artigos 6 a 23 da Lei 8/1989, do 13 de abril, de taxas e prezos públicos e preceptos concordantes da Lei xeral tributaria e da Lei xeral presupostaria. Tamén serán de aplicación directa os preceptos pertinentes da Ordenanza fiscal xeral así como os Regulamentos de Réxime Interno das escolas infantís municipais.

Nas prazas das escolas cofinanciadas con fondos doutras administracións a cota a aboar polas familias sería o correspondente a parte non financiada

DISPOSICIÓN FINAL

A presente ordenanza entrara en vigor trala publicación no Boletín Oficial da Provincia, e permanecerá en vigor ata a súa modificación ou derogación expresa. ¹

O texto da ordenanza transcrita, é o da súa redacción vixente, integrada coas modificacións aprobadas polo Concello Pleno mediante acordo de data 27.10.2022, para rexer a partir do 1 de xaneiro de 2023 (Boletín Oficial da Provincia de Lugo núm. 294 do 26.12.2022).